




Informativni bilten Općine Novo Sarajevo



IZDVAJAMO:

- ***Konstituisano Općinsko vijeće Novo Sarajevo, za predsjedavajućeg Općinskog vijeća izabran Robert Pleše***
- ***Nakon nekoliko mjeseci zastoja ponovo intenzivirani radovi na izgradnji podzemne garaže G3 u ulici Kolodvorska***

Informativni bilten Općine Novo Sarajevo

KONSTITUISANO OPĆINSKO VIJEĆE NOVO SARAJEVO, ZA PREDSEDAVAJUĆEG OPĆINSKOG VIJEĆA IZABRAN ROBERT PLEŠE



Konstituirajuća sjednica Općinskog vijeća Novo Sarajevo održana je u petak, 08. januara ove godine u Međunarodnom centru za djecu i omladinu Novo Sarajevo.

Vijećnici su usvojili prijedlog Odluke o izboru Verifikacione komisije Općinskog vijeća Novo Sarajevo, koja je verificirala mandate vijećnika, nakon čega su vijećnici dali svečanu izjavu. Na Konstituirajućoj sjednici za predsjedavajućeg Općinskog vijeća Novo Sarajevo izabran je Robert Pleše (Naša stranka), a za zamjenike predsjedavajućeg izabrani su Džaka Nijaz (NiP), Kalamujić Majda (SDP) i Salihagić Nedim (NBL).

Novoizabrani predsjedavajući Općinskog vijeća Robert Pleše zahvalio se vijećnicima na ukazanom povjerenju, te nastavio dalje sa vođenjem Konstituirajuće sjednice.



U Općinskom vijeću Novo Sarajevo participira osam političkih stranaka, a najviše mandata ukupno devet vijećnika ima Narod i Pravda (NiP), Naša stranka (NS) i Stranka demokratske akcije (SDA) imaju po pet vijećnika, Socijaldemokratska patrija BiH (SDP) četiri vijećnika, Platforma za progres, Stranka za bolju budućnost (SBB), NBL, DF-GS imaju po dva mandata. Nakon izbora rukovodstva Općinskog vijeća, predsjednik Kluba vijećnika stranke Narod i Pravda konstatovao je da ova politička partija nastavlja rad u Općinskom vijeću sa osam vijećnika.

Nakon Konstituirajuće sjednice održane su odmah i dvije hitne sjednice Općinskog vijeća. Na Prvoj hitnoj sjednici usvojene su odluke o snivanju komisija i radnih tijela Općinskog vijeća i to: Komisije za statut i propise, Komisije za ljudska prava, slobode i rodnu ravnopravnost, Komisije za pitanja mladih, Komisije za statusna pitanja boraca, Komisije za budžet i finansije, Komisije za odnose s mjesnim zajednicama i zaštitu čovjekove okoline, Komisije za poslove iz stambene oblasti, Komisije za strateško planiranje i razvoj općine, Drugostepene stručne komisije, Komisije za urbanizam i upotrebu lokalnog zemljišta i Etičke komisije.

Na Drugoj hitnoj sjednici Vijeća, koja je održana odmah nakon Prve, vijećnici su po hitnom postupku usvojili Odluku o privremenom finansiranju Općine Novo Sarajevo za period januar – mart 2021. godine, nakon čega je usvojen i Nacrt Budžeta Općine Novo Sarajevo za 2021. godinu, kao i Nacrt Odluke o izvršavanju Budžeta Općine Novo Sarajevo za 2021. godinu.

Nacrt Budžeta Općine Novo Sarajevo za 2021. godinu iznosi 20.365.000,00 KM i stavlja se na Javnu raspravu u trajanju od deset dana, počev od 11. januara ove godine.

Informativni bilten Općine Novo Sarajevo

NA 1. REDOVNOJ SJEDNICI OPĆINSKOG VIJEĆA USVOJEN PROGRAM RADA OPĆINSKOG VIJEĆA NOVO SARAJEVO ZA 2021. GODINU



Prva redovna sjednica Općinskog vijeća Novo Sarajevo, kojom je predsjedavao predsjedavajući Općinskog vijeća Novo Sarajevo Robert Pleše, održana je u četvrtak, 28. januara ove godine u Međunarodnom centru za djecu i omladinu Novo Sarajevo.

Nakon što je podneseno više vijećničkih pitanja i inicijativa, vijećnici Općinskog vijeća Novo Sarajevo jednoglasno su usvojili Odluku o imenovanju Investicionog menadžera za 2021. godinu. Za investicionog menadžera za tekuću godinu imenovan je načelnik Općine Novo Sarajevo dr. Hasan Tanović.



Na prvoj redovnoj sjednici Vijeća usvojen je i Programa rada Općinskog vijeća Novo Sarajevo za 2021. godinu sa usvojenim amandmanima. Program rada Vijeća sadrži njegove obaveze i zadatke koji proizilaze iz ustava, zakona, utvrđenih politika i ekonomskog razvoja Općine, Grada i Kantona kao i druge poslove i zadatke u rješavanju društvenih pitanja od interesa za građane općine.

Vijećnici su usvojili i Odluku o verifikaciji mandata članovima savjeta mjesnih zajednica na području općine Novo Sarajevo. Ovom Odlukom članica Savjeta MZ „Trg heroja“ Kalamujić Majda zamijenjena je novom članicom Šunjić Sabinom,

dok je u MZ “Željeznička“ član Savjeta Babić Jozo, zamijenjen novim članom Zubača Avdom.

Na sjednici je podnesena informacija o realizovanim projektima odabranim na osnovu Javnog poziva OCD/NVO za predaju prijedloga projekata iz oblasti obrazovanja, kulture, sporta, podrške mladima, podrške za djecu sa poteškoćama u razvoju i oblasti zaštite okoliša za 2019. godinu. U infomaciji je navedeno da shodno Odluci Općinskog načelnika o izboru najuspješnijih projekata za 2019. godinu, odobrena su sredstva za realizaciju ukupno jedanaest projekata. Sve organizacije civilnog društva realizovale svoje aktivnosti i ostavile predviđene rezultate prema odabranim projektnim prijedlozima.

Vijećnicima je podnesena i Informacija o radu osnovnih škola na području općine Novo Sarajevo, kao i Informacija o stanju u oblasti kulture, sporta, omladinskih i nevladinih organizacija na području općine Novo Sarajevo.

Informativni bilten Općine Novo Sarajevo

ON-LINE PREDSTAVLJANJE USAID-OVOG PROJEKATA E-UPRAVE PRATIO OPĆINSKI NAČELNIK DR. HASAN TANOVIĆ SA SARADNICIMA

Američka agencija za međunarodni razvoj (USAID) pokreće novi projekat E-uprave čijom realizacijom bi se pomoglo Bosni i Hercegovini u poboljšanju transparentnosti i smanjenju korupcije u procedurama koje provode nadležni organi. Fokus aktivnosti je na digitalizaciji ovih postupaka, te na omogućavanju automatizacije procedura koje će imati pozitivan uticaj na građane i poslovni sektor u BiH.

Na zvaničnom predstavljanju ovog projekta putem online platforme učestvovao je i načelnik Općine Novo Sarajevo dr. Hasan Tanović sa svojim saradnicima. Skupu su prisustvovali ministri iz nadležnih

entitetskih ministarstava, predstavnici UNDP-a u BiH, načelnici općina, predstavnici agencija, te donatori uključeni u realizaciju projekta E-uprave u BiH. Skup je otvorio američki ambasador u Bosni i Hercegovini N.J.E. Erik Nelson.

U svom obraćanju ambasador Nelson istakao je kako se radi o projektu koji će se u velikoj mjeri odraziti na svakodnevni život građana u BiH, a USAID i nadležni bh. organi će primjenom informatičkog rješenja značajno smanjiti troškove i vrijeme koje je do sada podrazumijevalo korištenje javnih usluga, te povećati kvalitet i transparentnost usluga i javnih funkcija.

„Ova rješenja će vratiti vjeru u rad institucija u BiH. Naglasit ću pet oblasti u kojima treba proizvesti hitnu akciju a to su: E-potpis, E-gradevinske dozvole, Inspeksijski poslovi, E-registri socijalne pomoći i integracija digitalizacije u sistem javnih nabavki, istakao je ambasador Nelson.

Projekat će se realizovati u narednih pet godina, a za realizaciju će biti obezbijeđeno 10,9 miliona dolara. USAID-ov projekat E-uprave pružit će softversku, hardversku i tehničku pomoć u pomenutim oblastima.



Informativni bilten Općine Novo Sarajevo

ODRŽAN SASTANAK O PRISTUPANJU OPĆINA REGISTRIMA IMENOVANIH LICA I ZAPOSLENIH U JAVNOM SEKTORU KANTONA SARAJEVO



U Kantonu Sarajevo održan je sastanak ministricе pravde i uprave Kantona Sarajevo Lejle Brčić sa načelnicima i predstavnicima sarajevskih općina.

Uz načelnike općina Centar Srđana Madića, Novo Sarajevo Hasana Tanovića, Stari Grad Ibrahima Hadžibajrića, Ilijaša Akifa Fazlića, Ilidže Nermina Muzura, Vogošće Edina Smajića, te predstavnika općina Trnovo i Hadžići sastanku je prisustvovao i šef Ureda za borbu protiv korupcije i upravljanje kvalitetom KS Erduan Kafedžić.

Primarna tema sastanka je bila priključivanje općina uspostavljenim kantonalnim registrima imenovanih lica i zaposlenih u javnom sektoru,

kao i registru javnih nabavki.

Ministrica Brčić u svom obraćanju istakla je da je prezentovanje javnosti podataka o zaposlenima u javnom sektoru Kantona Sarajevo, uspostavljeno registrom zaposlenih 2019. godine, naišlo na široko odobrenje građana u Kantonu Sarajevo, te je dodala da je jako važno da sve ovo krene sa lokalnog nivoa i da se općine priključe ovom procesu.

Jedinstven pregled kadrova u javnoj službi u KS i reguliranje ove oblasti kroz zakon o jedinstvu javnog sektora stvorio bi prostor za razmjenu kadra unutar javnog sektora, na zakonit način, uz prethodnu regulativu koju je potrebno usaglasiti i sa višim nivoima vlasti. To bi, prema riječima ministricе Brčić, pored jačanja transparentnosti, doprinijelo i ograničenju rasta birokratskog aparata, uz optimalno upravljanje ljudskim resursima u cjelokupnom javnom sektoru u KS. Načelnici općina su danas iskazali svoju punu spremnost da se općinske administracije uključe u već uspostavljene registre ne dovodeći u pitanje zajedničku potrebu uspostavljanju jedinstvenog prikaza ovih podataka.

Načelnici Mandić, Tanović, Muzur i Hadžibajrić su potvrdili pristupanje općina Centar, Novo Sarajevo, Ilidža i Stari Grad uspostavljenim kantonalnim registrima, ali i svim drugim aktivnostima koje su budu provodile na polju borbe protiv korupcije.

Načelnici Fazlić i Smajić su naglasili da su u potpunosti opredjeljeni svim aktivnostima koje su u funkciji transparentnosti, te da u potpunosti podržavaju inicijativu Ministarstva pravde i uprave KS, ali i naglasili da će izvršiti dodatne konsultacije na općinskim vijećima, kako bi i navedeni organi bili uključeni u donošenje odluke.

Proceduru uključivanja općina u ova tri registra vodit će Ured za borbu protiv korupcije i upravljanje kvalitetom KS koji je uspostavio i upravlja postojećim registrima. Šef Ureda Erduan Kafedžić prisutne je detaljnije upoznao o tehničkom aspektu uključivanja općina u ovaj proces, ali i o benefitima koje ta aktivnost donosi u sferi sprečavanja sukoba interesa, kao i u efikasnijoj borbi protiv korupcije.

Na kraju sastanka, ministrica Brčić je istakla da će Vlada KS već na svojoj idućoj sjednici donijeti Odluku o izmjeni Odluke o uspostavi registra, kako bi se ugradila preporuka općinama da se i one uključe u ove registre.

SARADNJA VLADE KANTONA SARAJEVO I OPĆINE NOVO SARAJEVO NA REALIZACIJI BUDUĆIH ZAJEDNIČKIH PROJEKATA

Premijer Kantona Sarajevo Edin Forto i načelnik Općine Novo Sarajevo dr. Hasan Tanović održali su sastanak na kojem su razgovarali o realizaciji budućih zajedničkih projekata Kantona i ove lokalne zajednice.

Neki od tih projekata su pokretanje razvoja Kampusa Univerziteta u Sarajevu, posebno kada je u pitanju izgradnja Univerzitetske biblioteke, te planiranje cjelokupnog kompleksa kao jednog velikog razvojnog projekta.

Informativni bilten Općine Novo Sarajevo



Pored toga, razgovarano je o ubrzanju realizacije projekata vezanih za zamjene i popravke liftova na području Općine Novo Sarajevo, kao i o saradnji na projektima energetske efikasnosti, odnosno utopljanja individualnih objekata.

„Radi se o jednoj od mjera u borbi za čišći zrak u Kantonu Sarajevo, u kojoj je Općina najavila svoje učestvovanje kroz sufinansiranje. Od izuzetne važnosti za kreiranje boljeg života u Kantonu jeste saradnja Kantona i lokalnih zajednica na realizaciji razvojnih projekata”, rekao je premijer Forto.

ODRŽAN SASTANAK SA KANTONALNOM MINISTRICOM ODGOJA I OBRAZOVANJA U CILJU INTENZIVIRANJA AKTIVNOSTI NA REALIZACIJI PROJEKTA IZGRADNJE OBJEKTA OŠ „POFALIĆI“

Na inicijativu Općine Novo Sarajevo u ponedjeljak, 25. januara ove godine u prostorijama Kantona Sarajevo održan je sastanak sa ministricom odgoja i obrazovanja Kantona Sarajevo Naidom Hota-Muminović, a u povodu intenziviranja aktivnosti na realizaciji projekta izgradnje objekta JU Osnovna škola „Pofalići“. Sastanku je prisustvovao načelnik Općine Novo Sarajevo dr. Hasan Tanović sa saradnicima.

Ranije je potpisan Sporazum o regulisanju međusobnih odnosa na realizaciji Projekta izrade investiciono tehničke dokumentacije za izgradnju objekta JU Osnovna škola „Pofalići“ između Ministarstva za obrazovanje, nauku i mlade KS, Općine Novo Sarajevo i Zavoda za izgradnju KS koji je implementator projekta.

Kako bi se intenzivirale aktivnosti na pribavljanju potrebne dokumentacije i saglasnosti za realizaciju ovog projekta, na sastanku je dogovoreno da resorno Ministarstvo što prije pristupi izradi Sporazuma kojim će se regulisati formalno – pravne činjenice oko određivanja investitora, sufinansijera projekta i slično, a što je predušlov za nastavak postupka izdavanja urbanističke saglasnosti za izgradnju objekta ove osnovne škole.

Ministrica Hota- Muminović dala je punu podršku realizaciji ovog značajnog projekta, budući da se radi o jednom od najstarijih školskih objekata na području Općine Novo Sarajevo, a kojim će se uveliko unaprijediti kvalitet odvijanja nastave za učenike, kako ove lokalne zajednice, tako i Kantona.

ODRŽAN SASTANAK OPĆINSKIH NAČELNIKA SA MINISTROM PRIVREDE KANTONA SARAJEVO ADNANOM DELIĆEM

Ministar privrede Kantona Sarajevo Adnan Delić održao je danas sastanak sa načelnicima općina s područja Kantona Sarajevo, u cilju dogovora o budućoj saradnji i utrošku sredstava za privredu u ovoj budžetskoj godini, sa fokusom na industrijsko-poslovne zone, poljoprivredu, vodoprivredu i šumarstvo.

Sastanku je prisustvovao i načelnik Općine Novo Sarajevo dr. Hasan Tanović sa saradnicima.



Informativni bilten Općine Novo Sarajevo



Ministar Delić informisao je načelnike da će budžetom Kantona za ovu godinu biti planirana veća sredstva za industrijsko-poslovne zone. Istakao je kako je neophodno što prije dostaviti projekte u ovoj oblasti resornom ministarstvu, kako bi sredstva mogla biti implementirana. Osim za opremanje industrijskih zona, veći iznos sredstava neophodno je usmjeriti i za rješavanje imovinsko-pravnih odnosa kako bi se te zone mogle širiti. Općinama će biti pružena pomoć i u izradi neophodne projektne dokumentacije za otvaranje novih poslovno-industrijskih zona.

Naglašeno je i kako su Programom utroška namjenskih sredstava u ovoj godini planirana veća izdvajanja za oblast poljoprivrede.

Poljoprivrednicima treba pomoći kroz legalizaciju poljoprivrednih objekata, pojednostavljenje procedura apliciranja na poticajna sredstva, plasman viška proizvoda, dodjelu na korištenje zemljišta koje nije proglašeno građevinskim.

Kriterije za dodjelu poticaja također bi trebalo sistemski urediti kako ne bi bilo zloupotreba. Kao jedno od rješenja navedeno je da bi se višak poljoprivrednih proizvoda mogao plasirati u robne rezerve.

Teme razgovora bile su i projekti uređenja riječnih korita koji se finansiraju iz budžeta kantona kroz tzv. vodne naknade, a koji će biti nastavljeni i u ovoj godini, projekti razvoja planinskog turizma, te pošumljavanja devastiranih zemljišta.

Sastanku su se odazvali načelnici i predstavnici svih općina, te su izrazili zahvalnost ministru Deliću na njegovoj organizaciji, ističući kako je ovakav vid komunikacije važan za buduću saradnju.

ZAJEDNIČKI ANGAŽMAN OPĆINA NOVO SARAJEVO I CENTAR S CILJEM POBOLJŠANJA KVALITETE ŽIVLJENJA GRAĐANA



Načelnici Općine Centar i Novo Sarajevo Srđan Mandić i dr. Hasan Tanović razgovarali su o mogućnostima zajedničkog angažmana dvije susjedne lokalne zajednice s ciljem poboljšanja kvaliteta življenja građana.

Prva transverzala je samo jedan od projekta koji je od značaja za ove dvije općine, a poznato je da njena trasa prolazi kroz teritorije Centra i Novog Sarajeva. Zaključeno je da je potrebno uložiti više napora u realizaciji ovog infrastrukturnog projekta.

Između ostalog, u planu su i zajednički nastupi i saradnja pri apliciranju za sredstva viših nivoa vlasti.

Na sastanku je dogovoreno i da se susreti načelnika održavaju periodično gdje bi se analizirala dinamika, ali i mogućnosti za pokretanje novih zajedničkih projekata.

INTENZIVIRANJE SARADNJE TURISTIČKE ZAJEDNICE KS I OPĆINE NOVO SARAJEVO SA CILJEM RAZVOJA TURIZMA I PROMOCIJE OVE LOKALNE ZAJEDNICE

Predsjedavajući Povjerenstva Turističke zajednice Kantona Sarajevo Mufik Muslić i Faruk Čuluk ispred Turističke zajednice KS posjetili su Općinu Novo Sarajevo, te tim povodom održali sastanak sa Općinskim načelnikom dr. Hasanom Tanovićem.

Turizam u glavnom gradu BiH prošle godine doživio je veliki pad zbog posljedica izazvanih pandemijom korona virusa. Turistička zajednica Kantona Sarajevo nije prestajala sa radom, a nove nade polažu se u 2021. godinu kada je u pitanju ova oblast.

Na sastanku je razgovarano o intenziviranju saradnje Općine Novo Sarajevo i Turističke zajednice KS kada su u pitanju zajednički projekti koji će doprinijeti razvoju turizma i promocije ove lokalne zajednice kako u BiH, tako i regionu.



NAKON NEKOLIKO MJESECI PONOVO INTENZIVIRANI RADOVI NA IZGRADNJI PODZEMNE GARAŽE G3 U ULICI KOLODVORSKA



Radovi na izgradnji podzemne garaže G3 u ulici Kolodvorska, u neposrednoj blizini objekta Službe za hitnu pomoć, nakon nekoliko mjeseci ponovo su intenzivirani.

Radovi su trebali biti okončani u novembru 2020. godine ali kako su se javile poteškoće sa izmiještanjem podzemnih instalacija komunalnih preduzeća na tom dijelu radovi su obustavljeni dok se ne riješe administrativno – pravne obaveze i stvore uslovi za ponovno uvođenje izvođača radova, što je u međuvremenu prouzrokovalo dodatne probleme oko odvijanja saobraćaja na ovom lokalitetu.

Na inicijativu Općine Novo Sarajevo, a udruženim snagama nadležnih institucija koje

provode realizaciju ovog projekta Ministarstva saobraćaja KS, Zavoda za izgradnju KS i Direkcije za puteve KS, nakon pokrenutih nekoliko paralelnih procesa konačno je omogućeno da se izvođač radova ponovo uvede u rad i nastavi sa izgradnjom ovog velikog projekta.

Na jednom od sastanaka u Općini Novo Sarajevo, dogovoreno je da je tokom izvođenja pomenutih radova neophodno stvoriti uslove za nesmetano odvijanje saobraćaja u ulici Kolodvorska, kako zbog blizine objekta Službe hitne pomoći, tako i zbog same frekvencije saobraćaja, ali i saobraćaja u mirovanju.

Zbog kompleksnosti ovog saobraćajnog projekta, planirani rok završetka izgradnje podzemne garaže je od tri do četiri mjeseca.

Informativni bilten Općine Novo Sarajevo

POTPISAN UGOVOR ZA IZVOĐENJE RADOVA NA SANACIJI DEVASTIRANOG STAMBENOG FONDA KOJIM RASPOLAŽE OPĆINA NOVO SARAJEVO

Sanacijom će biti obuhvaćene stambene devastirane jedinice u ulicama: Behdžeta Mutevelića 17/ V sprat, Derviša Numića 56/ I sprat, Derviša Numića 56/ prizemlje i Ljubljanska 18b/potkrovlje.

U stanovima na navedenim adresama predviđeni su građevinsko-zanatski, elektroinstalacioni, kao i radovi na vodovodnoj i kanalizacionoj mreži.

Realizaciji ovog projekta pristupit će se na osnovu potpisanog Ugovora za izvođenje radova na sanaciji devasiranog stambenog fonda kojim raspolaže Općina Novo Sarajevo.

Vrijednost ugovora je 61.776,00 KM.

Izvođač radova je „GALBOLS“ d.o.o. Sarajevo.

POSTAVLJANJE NOVIH I KOREKCIJA POSTOJEĆIH PLOČA NA SPOMEN-OBILJEŽIJIMA NA PODRUČJU OPĆINE NOVO SARAJEVO



Ugovor za nabavku i postavljanje ploča na spomen-obilježja na području Općine Novo Sarajevo potpisan je u ponedjeljak, 04. januara ove godine.

Radi se o izvođenju radova na korekcijama na tablama sa imenima šehida i poginulih boraca na spomen-obilježijima, zatim postavljanju novih tabli i zamjeni stakla na memorijalnim panoima, te izradi i ugradnji znaka priznanja Zlatni ljiljan i Zlatna policijska zvijezda.

Ovim projektom će biti obuhvaćena spomen-obilježja Hrasno i Hrasno brdo, Malta, Trg Heroja, Grbavica, Pofalići i spomen-obilježje Velešići. Izvođač radova je firma „Fadž-company“ d.o.o. Ilidža, a za ove namjene

Općina Novo Sarajevo izdvojila je oko 18.000,00 KM. Rok za završetak radova je 45 dana od dana uvođenja u posao.

UNAPREĐENJE SARADNJE SA MINISTARSTVOM KULTURE I SPORTA KANTONA SARAJEVO

Ministar kulture i sporta Kantona Sarajevo Samir Avdić i načelnik Općine Novo Sarajevo dr. Hasan Tanović održali su sastanak u zgradi Općine povodom unapređenja buduće saradnje Ministarstva i ove lokalne zajednice.

Ministar Avdić upoznao je načelnika sa planiranim aktivnostima i projektima ministarstva iz oblasti sporta koji bi se provodili u novosarajevskim osnovnim školama sa ciljem promovisanja zdravih stilova života kod djece kroz sportsko-rekreativne aktivnosti.

Općinski načelnik dr. Tanović istakao je da će Općina Novo Sarajevo podržavati projekte koji imaju za cilj razvoj sporta i kulture na području ove općine, a sve u skladu sa svojim mogućnostima i nadležnostima.



“U narednom periodu analizirat ćemo planirane aktivnosti iz ovih oblasti, te zasigurno inicirati određene projekte koji bi se zajednički mogli realizirati, a sve u interesu kako građana i građanki Općine, tako i Kantona Sarajevo. Na području naše Općine smješteno je i više različitih ustanova kulture i sporta, koje treba iskoristiti na najkvalitetniji način i u skladu sa namjenom za koju su osnovane”, poručio je načelnik.

Informativni bilten Općine Novo Sarajevo

INTENZIVIRANA SARADNJA OPĆINE NOVO SARAJEVO I UNIVERZITETA U SARAJEVU



U zgradi Općine Novo Sarajevo u utorak, 12. januara ove godine održan je sastanak delegacija Općine Novo Sarajevo i Univerziteta u Sarajevu koje su predvodili Općinski načelnik dr. Hasan Tanović i prof.dr. Rifat Škrijelj, rektor Univerziteta u Sarajevu.

Općinski načelnik dr. Tanović naglasio je da je saradnja sa Univerzitetom u Sarajevu od iznimne važnosti budući da se Kampus nalazi upravo na teritoriji Općine Novo Sarajevo i predstavlja jako bitan faktor i potencijal lokalnog razvoja. Rektor Univerziteta u Sarajevu, prof. dr. Rifat

Škrijelj dao je pregled stanja i realizacije projekata i inicijativa koje se odnose na oblast održavanja, razvoja i izgradnje Kampusu Univerziteta u Sarajevu, te upoznao načelnika sa mogućnostima saradnje između Općine i Univerziteta koje će osigurati bržu i kvalitetniju implementaciju planiranih aktivnosti.

Naročita pažnja posvećena je različitim aspektima saradnje u realizaciji kapitalne investicije koja se odnosi na izgradnju Univerzitetske biblioteke, te uređenja prostora u Kampusu Univerziteta koji će biti u funkciji primarnih nastavnih i naučno-istraživačkih potreba Univerziteta, ali i na raspolaganju građanima i građankama Općine Novo Sarajevo, kao uređeni prostor sa sadržajima koji će unaprijediti opći standard života lokalne zajednice.

Na sastanku je dogovorena dalja intenzivna saradnja, koja će se voditi principom da je interes Univerziteta u Sarajevu istovremeno i interes Općine Novo Sarajevo.

PREDSTAVNICI UDRUŽENJA „ZABORAVLJENA DJECA RATA“ I FONDACIJE „KRILA NADE“ U POSJETI OPĆINI NOVO SARAJEVO



U zgradi Općine Novo Sarajevo održan je sastanak sa predstavnicima Udruženja „Zaboravljena djeca rata“ i Fondacije „Krila nade“.

Sastanku su prisustvovali načelnik Općine Novo Sarajevo dr. Hasan Tanović sa saradnicima, predsjednica Udruženja „Zaboravljena djeca rata“ Ajna Jusić i direktorica Fondacije „Krila nade“ Marija Šarić.

Na sastanku je prezentiran dosadašnji rad i aktivnosti Udruženja „Zaboravljena djeca rata“, čija je osnovna uloga borba za prava djece koja su rođena kao posljedica rata, odnosno ratnog silovanja i kao takvo

trenutno je jedino Udruženje na svijetu koje se bavi ovom specifičnom tematikom.

Općinski načelnik dr. Hasan Tanović uputio je podršku ovom Udruženju budući da ima jednu humanu ulogu, a to je kontinuirana borba za jednaka prava ove najranjivije kategorije djece koja su nažalost ostala u sjeni rata. Dogovoreno je također, da u narednom periodu ovo Udruženje konačno dobije na korištenje općinski poslovni prostor u naselju Grbavica pod povoljnijim uslovima, a koji će dijeliti sa Fondacijom „Krila nade“, kako bi mogli na adekvatan način provoditi svoje projekte i aktivnosti.

U znak zahvalnosti i buduće uspješne saradnje sa Općinom Novo Sarajevo, predsjednica Udruženja „Zaboravljena djeca rata“ Ajna Jusić poklonila je jednu od svojih publikacija Općinskom načelniku dr. Tanoviću.

OPĆINA NOVO SARAJEVO PODRŽALA AKTIVNOSTI I PROJEKTE ŠKOLE ZA SREDNJE STRUČNO OBRAZOVANJE I RADNO OSPOSOBLJAVANJE SARAJEVO



Načelnik Općine Novo Sarajevo dr. Hasan Tanović obišao je Školu za srednje stručno obrazovanje i radno osposobljavanje Sarajevo.

Ova srednja škola, koja je smještena na području Općine Novo Sarajevo, obrazuje i radno osposobljava mlade sa poteškoćama u razvoju u dobi od 15 do 22 godine, sa lakim i umjerenim intelektualnim teškoćama na smijerovima: kuhar, moler, knjigovezac, operator za unos podataka, pomoćni dekorater i cvjećar.

Direktorica Škole, dr.sc. Inga Biščević upoznala je Općinskog načelnika sa radom i aktivnostima škole, ali i sa najčešćim problemima sa kojima se susreću tokom rada, budući sa se radi o osjetljivoj kategoriji učenika.

Budući da je ovo jedina obrazovna ustanova sa srednje obrazovanje i radno osposobljavanje djece sa poteškoćama u Kantonu Sarajevo, ovu školu pohađaju učenici iz cijelog sarajevskog Kantona, ali i iz drugih kantona FBiH.

U svom obraćanju direktorica Biščević istakla je da je ova škola član partnerske grupe za razvoj Općine, gdje je svojim aktivnim učešćem dala veliki doprinos u procesu izrade revidirane Strategije razvoja Općine



Novo Sarajevo 2019 – 2023.

– Nedavno smo potpisali Izjavu o partnerstvu u smislu obezbjeđenja prostora za implementaciju projekta „Kabinet za asistivnu tehnologiju i senzornu integraciju“, sa kojim je Općina Novo Sarajevo aplicirala na javni poziv UNDP-a namijenjen Jedinicama lokalnih samouprava u FBiH iz Grant sheme „Poboljšanje dostupnosti i kvaliteta javnih usluga u općinama i gradovima u FBiH“, istakla je Inga Biščević, te dodala da će implementacijom navedenog projekta ovo biti prvi savremeni kabinet za asistivnu tehnologiju i senzornu integraciju za djecu sa poteškoćama u razvoju.

Općinski načelnik dr. Tanović istakao je da će Općina Novo Sarajevo nastaviti podržavati ovakve i slične projekte koji za cilj imaju unapređenje obrazovnog sistema za ovu kategoriju djece, kojima je svaki vid pomoći potreban i jako važan. Pored besplatnih đačkih užina i prevoza djece do škola koje je planirano i ove godine, Općina će podržati i druge kvalitetne projekte u skladu sa svojim mogućnostima i nadležnostima, a posebno one koji su samoodrživi.

Nakon kratkog sastanka, upriličen je i obilazak škole. U ime učenika i nastavnog osoblja škole, Općinskom načelniku dr. Hasanu Tanoviću uručena je zahvalnica i prigodan poklon koji je djelo učenika ove škole.

Informativni bilten Općine Novo Sarajevo

OPĆINSKI NAČELNIK DR. HASAN TANOVIĆ PODRŽAO IDEJU O USPOSTAVI PRVOG DNEVNOG CENTRA ZA DJECU SA POTEŠKOĆAMA U RAZVOJU NA PODRUČJU OPĆINE NOVO SARAJEVO



U Općini Novo Sarajevo održan je sastanak sa predstavnicima Udruženja „Dajte nam šansu“, a na kojem su prisustvovali direktorica Udruženja Ines Kavalac i načelnik Općine Novo Sarajevo dr. Hasan Tanović sa saradnicima.

Sastanak je održan u cilju nastavka saradnje na uspostavi prvog Dnevnog centra za djecu sa težim oblicima poteškoća u razvoju i stepenom invaliditeta u Sarajevu, a koji bi im bio na raspolaganju kontinuirano svaki dan od osam do deset sati. U dnevnom centru bi ova djeca imala svu potrebnu pomoć i podršku, a ujedno bi i roditelji te djece imali vremena da obave potrebne aktivnosti ili budu radno aktivni, dok su im djeca adekvatno zbrinuta.



Do sada u Sarajevu, a u organizaciji Udruženja „Dajte nam šansu“ djeluju dva Servis centra za podršku porodicama djece/osoba sa poteškoćama u razvoju koji pružaju usluge za 800 porodica bez obzira na dob, vrstu poteškoće ili stepen invaliditeta. Općinski načelnik dr. Hasan Tanović, zajedno sa načelnicima gradskih općina, te premijerom KS Edinom Fortom, već ranije je dao podršku uspostavi ovakvih centara u Sarajevu, a na ovom sastanku je posebno podržao ideju da se prvi Dnevni centar otvori na području Općine Novo Sarajevo. S tim u vezi, načelnik Tanović poručio je direktorici Kavalac da će Općina Novo Sarajevo stajati na raspolaganju ovom Udruženju u iznalaženju najadekvatnijih rješenja za realizaciju ovog značajnog projekta.

OO CRVENOG KRIŽA NOVO SARAJEVO DOLASKOM NOVE ADMINISTRACIJE NAKON DUGOG NIZA GODINA PONOVO NA LISTI PRIORITETA OPĆINE

U Općini Novo Sarajevo održan je radni sastanak na kojem je delegacija Općinske organizacije Crvenog križa Novo Sarajevo prisutne upoznala o primjeni Zakona o Društvu Crvenog križa/krsta Bosne i Hercegovine i Zakona o Crvenom križu Federacije BiH, zatim o prvostepenoj presudi u vezi sa povratom imovine Dječijeg odmarališta Općinske organizacije Crvenog križa Novo Sarajevo u Lozici kod Dubrovnika, kao i drugim aktivnostima iz domena rada ove organizacije.

Kao dodatni vid pomoći i podrške, u narednim periodu će se aktivno uključiti i Pravobranilaštvo Općine Novo Sarajevo u savjetodavnom smislu i u skladu sa zakonskim mogućnostima.



www.novosarajevo.ba

Informativni bilten Općine Novo Sarajevo



Prilikom predstavljanja aktivnosti i rada OO Crvenog križa Novo Sarajevo, sekretar Asad Kučević je podsjetio je da se radi o Udruženju građana – neprofitnoj organizaciji koje je dobilo javna ovlaštenja, ali ne i izvore finansiranja. Naglasio je u svom radu nastoje pomoći svima onima kojima je to najpotrebnije.

Dr. Hasan Tanović, načelnik Općine Novo Sarajevo istakao je da je cilj Općinskoj organizaciji Crvenog križa Novo Sarajevo vratiti mjesto koje joj pripada.

„Podržavamo rad ove organizacije, a posebno sa aspekta boljeg opremanja njihovih struktura. U narednom periodu nastojat ćemo raditi na unapređenju

naše saradnje”, naglasio je dr. Tanović.

Ovom prilikom, predstavnici Crvenog križa Novo Sarajevo načelniku Općine dr. Tanoviću uručili su publikaciju „Stoljeće humanosti“ čime su mu čestitali na osvojenom mandatu, te zaželjeli puno sreće i uspjeha u predstojećem periodu.

Na kraju sastanka izvršena je i primopredaja lutki za vježbu oživljavanja.

Putem provedenih javnih nabavki za 2020. godinu, izvršena je nabavka pet lutki za vježbu oživljavanja, zaštitnih sredstava za umjetno disanje (10 setova po 50 komada u setu) i 2 seta disajnih vrećica-pluća (50 komada u setu), a sve u cilju obuke što većeg broja osoba za pružanje pomoći oživljavanja. Ukupna vrijednost nabavke je 6.000,00 KM.

CENTRI ZA ZDRAVO STARENJE NA PODRUČJU OPĆINE NOVO SARAJEVO PONOVO OTVORENI ZA ČLANOVE UZ OBAVEZNO PRIDRŽAVANJE HIGIJENSKO-EPIDEMIOLOŠKIH MJERA

Od ponedjeljka 4. januara ove godine, ponovo su počeli sa radom Centri za zdravo starenje na području Općine Novo Sarajevo.

Centri u Hrasnom, Velešićima i Čengić Vili otvoreni su za članove svaki radni dan od 09:00 do 15:00 sati, a uz obavezno pridržavanje higijensko-epidemioloških mjera.

U zatvorenom prostoru, u skladu sa mjerama, dozvoljen je boravak maksimalno 30 osoba. Prilikom ulaska u prostorije Centara obavezna je dezinfekcija, nošenje zaštitnih maski i držanje distance do 2 metra.



Rasporedi aktivnosti i sekcija će se prilagoditi odobrenim mjerama u cilju prevencije i zaštite. Svaka sekcija će dobiti posebne upute o radu, terminu, kao i načinu održavanja.

Do daljnjeg se neće organizovati veća okupljanja i zabave.

Informativni bilten Općine Novo Sarajevo

POSJETA BIBLIOTECI ZA SLIJEPA I SLABOVIDNA LICA U BOSNI I HERCEGOVINI I PODRŠKA RJEŠAVANJU PROBLEMA FINANSIRANJA DRŽAVNIH INSTITUCIJA KULTURE

Biblioteka za slijepa i slabovidna lica u Bosni i Hercegovini raspolaže knjižnim fondom od 29.386 bibliotečkih jedinica u tehnikama za slijepa na Brajevom pismu, audio i digitalnoj tehnici, svih književnih žanrova koje koriste 1.344 slijepih i slabovidnih korisnika svih uzrasta u našoj zemlji, kao i u inostranstvu. Među njima i 87 korisnika sa područja Općine Novo Sarajevo.

Jedinstvenu instituciju ove vrste u Bosni i Hercegovini, u ponedjeljak, 11.01.2021. godine, posjetio je načelnik Općine Novo Sarajevo dr. Hasan Tanović koji je sa direktorom Biblioteke za slijepa i slabovidna lica Sakibom Plehom obišao prostorije i upoznao se o načinu funkcioniranju ove institucije.



Uposlenici biblioteke, Jasminka Đuliman, Selena Bukva i Edin Omerhodžić predstavili su knjižni fond i mogućnosti Brajeve štamparije.

“Općina Novo Sarajevo ima senzibilitet prema Biblioteci za slijepa i slabovidna lica u Bosni i Hercegovini. To je jedna od sedam institucija kulture na državnom nivou za koje se definitivno što prije treba riješiti problem finansiranja, izjavio je, u obraćanju medijima, općinski načelnik dr. Hasan Tanović.

Direktor Sakib Pleh je naglasio da su od 1997.-2001. godine plaće zaposlenih i dio materijalnih troškova finansirane iz Budžeta Kantona Sarajevo, a od 2002. godine status je upitan, finansiranje neriješeno, sporadično, nedovoljno, bez jasnih naznaka i rješenja.

Biblioteka ima i isturena odjeljenja, a sve usluge u pogledu korištenja knjiga i časopisa su besplatne.

OPĆINA NOVO SARAJEVO PREPOZNAJE ZNAČAJ UDRUŽENJA „OBRAZOVANJE GRADI BIH“



Općinu Novo Sarajevo posjetio je Jovan Divjak, izvršni direktor Udruženja „Obrazovanje gradi BiH“ koje djeluje već 27 godina na području naše lokalne zajednice.

Njihova misija je „Djeca žrtava rata – naša trajna briga“.

U dosadašnjem radu dodijeli su 7.628 godišnjih stipendija djeci šehida i poginulih boraca, djeci i mladima sa invaliditetom, talentovanoj djeci i mladima romske nacionalne manjine, kao i onima u socijalnim potrebama. Pomažu i kroz druga materijalna davanja – odjeća, obuća, školski pribor, sportska oprema, hrana, ljetovanja i zimovanja. Općina Novo Sarajevo prepoznaje značaj ovog Udruženja koje ima za cilj da djeca i mladi kroz obrazovanje postanu korisni članovi bosanskohercegovačkog društva.

Sa Jovanom Divjakom razgovarali su načelnik Općine Novo Sarajevo dr. Hasan Tanović i predsjedavajući Općinskog vijeća Novo Sarajevo Robert Pleše koji su pružili podršku radu Udruženju „Obrazovanje gradi BiH“.

Informativni bilten Općine Novo Sarajevo

U PLANU ZAJEDNIČKE AKTIVNOSTI OPĆINE NOVO SARAJEVO I FK „ŽELJEZNIČAR“ POVODOM OBILJEŽAVANJA 100 GODINA OD OSNIVANJA KLUBA SA GRBAVICE



Aktivnosti i način funkcionisanja Fudbalskog kluba „Željezničar“ u narednom periodu predstavljeni su na sastanku u zgradi Općine Novo Sarajevo kojem su prisustvovali općinski načelnik dr. Hasan Tanović sa saradnicima i delegacija ovog kluba.

Jedan od problema sa kojim se susreću u FK „Željezničar“ je pad prihoda uzrokovanih pandemijom korona virusa. Ipak, vjeruju da će u narednom periodu biti omogućeno prisustvo navijača na utakmicama koje se igraju na stadionu Grbavica.

Ovo je bila prilika da se podsjeti da 2021. godine, FK „Željezničar“ obilježava 100 godina postojanja. U planu je da se kroz zajedničke aktivnosti Općine Novo Sarajevo i FK „Željezničar“ obilježi ovaj značajan jubilej.

Od oktobra 2020. godine, u skladu sa Izmjenama i dopunama Odluke o utvrđivanju javnog interesa nosilac aktivnosti koji će provoditi javni interes, kroz jačanje i afirmaciju omladinskog sporta na području Općine Novo Sarajevo je i Udruženje Fudbalski klub „Željezničar“ Sarajevo.

PODRŠKA OPĆINE NOVO SARAJEVO SISTEMSKOM RJEŠAVANJU NAČINA FINANSIRANJA KK „BOSNA-ROYAL“

Načelnik Općine Novo Sarajevo dr. Hasan Tanović razgovarao je sa predstavnicima Košarkaškog kluba „Bosna-Royal“ o stanju, planovima i smjeru njihovih daljih aktivnosti.

Ovom prilikom, postignuta je saglasnost da je potrebno sistemski riješiti način finansiranja KK „Bosna-Royal“. Općina Novo Sarajevo spremna je pružiti podršku ovom sportskom klubu sa dugogodišnjom uspješnom tradicijom postojanja i rada, u skladu sa zakonskim mogućnostima.

KK „Bosna Royal“ takmiči se u košarkaškom prvenstvu Bosne i Hercegovine. Najuspješniji je bosanskohercegovački klub svih vremena sa osvojenom europskom šampionskom titulom.

NASTAVAK SARADNJE SA JP „OLIMPIJSKI BAZEN OTOKA“ NA REALIZACIJI PROJEKTA ŠKOLE PLIVANJA ZA UČENIKE ČETVRTIH RAZREDA NOVOSARAJEVSKIH OSNOVNIH ŠKOLA

Općina Novo Sarajevo i J.P. Olimpijski bazen Otoka d.o.o. Sarajevo nastavljaju saradnju na realizaciji projekta Škole plivanja za učenike četvrtih razreda novosarajevskih osnovnih škola, kao i Centra „Vladimir Nazor“.

U prošloj godini, zbog pandemije i sigurnosti učenika, došlo je do zastoja u realizaciji ovog projekta.

Ipak, Općina Novo Sarajevo prepoznaje značaj i njegovu važnost s ciljem poboljšanja fizičke sposobnosti i zdravlja djece.

S obzirom da je Škola plivanja jedan do strateških projekata naše lokalne zajednice, zajednički interes je da što više novosarajevske djece nauči i savlada tehnike plivanja.

Dogovoreno je to na sastanku načelnika Općine Novo Sarajevo dr. Hasana Tanovića sa saradnicima i predstavnika JP Olimpijski bazen Otoka Enesa Pešteka i Muhidina Zametice.

Informativni bilten Općine Novo Sarajevo

POČELA OBUKA U ALPSKOM SKIJANJU ZA UČENIKE NOVOSARAJEVSKIH OSNOVNIH ŠKOLA

Besplatnom obukom u alpskom skijanju na Igmanu biće obuhvaćeno 90 učenika četvrtih razreda iz osam novosarajevskih osnovnih škola.

Počela je obuka prve grupe koja uz skijanje uživa i u zimskim radostima.

Ovaj tradicionalni općinski projekat provodi JU „Centar za sport i rekreaciju“ d.o.o., a na osnovu potpisanog Ugovora za pružanje usluga obuke učenika osnovnih škola sa područja Općine Novo Sarajevo u alpskom skijanju za 2020/21. godinu.

Vrijednost ugovora iznosi 20.000 KM.



JOŠ JEDNA GRUPA UČENIKA NOVOSARAJEVSKIH OSNOVNIH ŠKOLA USPJEŠNO SAVLADALA OBUKU IZ NORDIJSKOG SKIJANJA

Općina Novo Sarajevo u saradnji sa SKI klubom Igman i ove godine organizovala je obuku u nordijskom skijanju za 112 učenika novosarajevskih osnovnih škola koji su bili raspoređeni u dvije grupe.

SKI klub Igman obezbijedio je za sve polaznike prijevoz na skijalište i nazad, obuku sa trenerima, opremu za ski trčanje, medicinski nadzor, osiguranje, kao i topli napitak. Na kraju petodnevne obuke, organizovana je i završna utrka na uređenom skijalištu kojoj je prisustvovao i načelnik Općine Novo Sarajevo dr. Hasan Tanović. Polaznicima Škole nordijskog skijanja uručio je certifikate o uspješno završenoj obuci.

„Najbitniji aspekt ovog projekta je da djeca izađu na zrak i da se druže na Igmanu” rekao je, ovom prilikom, načelnik Tanović. Podsjetio je da je osim nordijskog, na zimskom raspustu, organizovana i besplatna obuka u alpskom skijanju kojom je bilo obuhvaćeno 90 učenika četvrtih razreda iz osam novosarajevskih osnovnih škola. U toku je i realizacija projekta pod nazivom „Zimska čarolija“. Ovaj projekat omogućava učenicima novosarajevskih škola i Centra „Vladimir Nazor” besplatno klizanje na platou Skenderija i vožnju žičarom do Trebevića. Karte je moguće preuzeti u osnovnim školama.



Informativni bilten Općine Novo Sarajevo

U OKVIRU „ZIMSKE ČAROLIJE“ OD 27. JANUARA BESPLATNO KLIZANJE NA PLATOU SKENDERIJA I VOŽNJA TREBEVIČKOM ŽIČAROM ZA UČENIKE NOVOSARAJEVSKIH OSNOVNIH ŠKOLA

Općina Novo Sarajevo i Međunarodni centar za djecu i omladinu Novo Sarajevo od 27. januara do 31. marta ove godine realizuju projekat pod nazivom „Zimska čarolija“ namijenjen učenicima osnovnih škola s područja Novog Sarajeva i Centra “Vladimir Nazor”.

Tokom „Zimske čarolije“ učenicima novosarajevskih osnovnih škola obezbijedeno je besplatno klizanje na platou Skenderija, kao i vožnja Trebevičkom žičarom.

Karte za navedene aktivnosti mogu se preuzeti u osnovnim školama, a mogu koristiti na slijedeći način:

– Karte za klizalište – mogu se iskoristiti u samo jednom terminu koji im odgovara, svakog dana od 11:00h do 21:00h, a do 14.02.2021.godine. Termin klizanja je u trajanju od 60 minuta sa korištenjem klizaljki.

– Karte za Trebevičku žičaru mogu se koristiti do 31. marta 2021. godine.

Općina Novo Sarajevo poziva sve učenike osnovnih škola da budu dio ovogodišnje Zimske čarolije i svoje zimske radosti provedu na najvećem gradskom klizalištu na Skenderiji i planini Trebević uz vožnju žičarom.

OPĆINA NOVO SARAJEVO I CENTAR ZA DJECU I OMLADINU NOVO SARAJEVO

REALIZUJU PROJEKAT «ZIMSKA ČAROLIJA»

BESPLATNO KLIZANJE NA PLATOU SKENDERIJA I VOŽNJA SARAJEVSKOM ŽIČAROM
ZA UČENIKE OSNOVNIH ŠKOLA NOVOG SARAJEVA

**SVI PRIJAVLJENI UČENICI BESPLATNE KARTE MOGU PODIĆI U SVOJIM ŠKOLAMA.
KARTE ZA KLIZANJE MOGU ISKORISTITI OD 27.01.2021. DO 14.02.2021.
KARTE ZA VOŽNJU ŽIČAROM MOGU ISKORISTITI OD 27.01.2021. DO 31.03.2021.**



Općina Novo Sarajevo

Sarajevo, 01. 02. 2021. godine

68. izdanje



ISO 9001 : 2015
Q-871 / 2006-05-12

**Bosna i Hercegovina
Federacija BiH
Kanton Sarajevo
Općina Novo Sarajevo**

Izdavač: Općina Novo Sarajevo

tel: +387 33 492 100

Fax: +387 33 644 559

Press: tel: +387 33 492 275/6

Fax: +387 33 492 342

E-mail: novosarajevo@novosarajevo.ba

press@novosarajevo.ba

www.novosarajevo.ba

UREĐIVAČKI TIM: *Elvira Zahiragić, Sunčica Zuban*

FOTOGRAFIJE: *Želimir Kozić*

DTP: *Odsjek za informisanje, odnose s javnošću i protokolarne poslove*